



Conde

1995-

Lb 18433







LETTRE DE
MONSEIGNEVR
LE PRINCE.
A LA ROYNE.

MA D A M E, Toute mon affection
a esté tousiours le seruice du Roy, &
bien de cest estat. Le l'ay tesmoigné du vi-
uant du feu Roy par mon absence neces-
sitée (& depuis sa mort) par mon prompt
retour prest de sa Majesté, cellant les des-
plaisirs que i'ay receus des desordres que
l'on a eus assez frequents pour empescher
les mouuemens desquels eust peu naistre la
guerre que i'ay estimée si dangereuse &
nuisible à la minorité du Roy, Monseignr:
que i'ay creut tous autres maux plus tolera-
bles. Si bien que par la grace de Dieu, vo-
stre bonté; & ma patiëce, nous sommes en
la quatriesme année de la minorité du Roy,
dans laquelle nous recognoissôs l'accrois-
sement de si grandes confusions & perni-
cieux desordres, que vostre susdite bonté
& nostre patiëce ne seroit assez forte pour
empescher le bouleuersement & la ruine
de cet estat: prolongée iusques icy par des
foibles & hôteux remèdes, s'il n'estoit ver-

CASE

F

39

326

1614

Com. 2^a

tueusement & prudemment pourueu par l'aduis de plusieurs Princes, Seigneurs Ecclesiastiques, Officiers de la Couronne & cours Souueraines.

Nous supplions très-humblemēt vostre Majesté d'y pouruoir de remedes salutaires à l'acquiēt du deuoir à quoy & vous, & nos^{es} sōmes obligez, à Dieu, au Roy, & à la Frâce. Supplication tres-iuste que nous eussions faite nous mesmes deuant vostre Majesté, n'eüst esté que nous la voyons entournée & préoccupée de peu de gens qui veulent regner dedans la confusion, seuls cause de nostre depart, & non vostre Majesté, de laquelle sçauons les louables intentions de tant plus remarquables que la verité vous a esté celée par ceux qui n'ont iustification que d'auoir maintenu vn peu de repos. Dās lequel ils nous ont tramé vn continuel travail par les confusions & prodigalitez, vêtes d'honneurs & de reputation, où ils ont prostitué tous les ordres de ce Royaume, duquel il auoient mesuré la durée de leur vie, sans se soucier de ce qui aduiendroit apres. Repos non prouenu de leur cōduite, ains des bons François, qui amateurs de paix ont souffert toutes maluersations, afflictions & charges, plustost que de susciter

aucun trouble, nō que tous ne viffēt qu'ils circonuenoient vōstre Majesté: partiffans l'administration de ce florissant Estat entre petit nombre de perfonnes ayās pour temoins de leur foiblesse la perte de la reputation de la France és pais estrangers, & leurs desseins cachez qui en ce grand Estat qui ne souloit rien craindre, deuoient estre sceus & ouuerts; du moins aux Princes & Officiers de la Courōne, interessez en l'Estat, lesquels ils n'ont rendus participās des affaires qu'autant qu'il leur sembloit necessaire, pour auctoriser leurs deliberatiōs, apportans leurs resolutiōs de leurs logis au Cabinet, & n'en faisans iamais cōclure vne seule en vōstre presence à la pluralité des voix. Mais les courans du maintien de l'auctorité de vōstre Majesté, du Cabinet delaquelle ils sortoient pour en dire leurs arrestz aux Princes, n'ayans reçu leurs aduis que par maniere d'acquit, tendans à susciter des enuies & diuisions entr'eux, fauorisans les vns & reculans les autres, faisans deux parties pour en auoir l'vne à leur deuotion. Artifices esprouuez si defastreux aux François, recommencés soudain apres le deceds du Roy, que Dieu absolue, reje-

ras les salutaires aduis de feu Mr. demayene,
qu'il n'estoit iuste de profiter ou rançonner
la minorité de nostre ieune Roy, qu'il ne
falloit rien demâder & servir ainsi que no^s
estions obligez naturellement: Mais au cō-
traire, interessât plusieurs particuliers pour
les auoir à leur deuotion. Ils ietterent l'E-
stat en des hazards tres-dangereux, contre
toutes formes vſitées aux minoritez des
Roys, esquelles ont estez tousiours assem-
blez les Estats generaux si necessaires que
les Roys les ont conuoquez en leurs majō-
ritez pour beaucoup moindres desordres
q; ceux d'apresēt. Pleust à Dieu (Madame)
qu'il m'eust cousté partie de mon sang, &
que les eussiez assemblez incontīnēt apres
le decez du Roy, vous feussiez en plus; ou
aussi iuste auctorité au gré de l'Eglise, de la
Noblesse, & du tiers Estat, la France n'eust
pêrdu ce genereux nō d'Arbitre de la Chre-
stienté, acquis si glorieusement par le def-
unt Roy. Tiltre qui tenoit la balance des
deux grandes factions de l'Europe, prote-
geant la trāquillité publique: & ceste perte
est d'autant plus grāde & deplorable, qu'il
semble que nous soyons sortis du chemin
que le feu Roy nous auoit tracé. On n'eust

pas razé la Citadelle de Bourg cōtre l'aduis
des Princes & Officiers de la Couronne,
mesme de Mr. le Cōestable. On n'eust pas
donné quatre cens mille liures, tant pour
le razemēt que pour la recōpense d'icelle.
On n'eust pas precipité le Mariage du Roy,
de Mesdames ses sœurs, auant que la loy
de Dieu, & tous les Ordres, la majorité du
Roy approchant l'eussent approuué. Ces
mariages eussent declarez au public, non
par la lecture d'un escript contenāt les rai-
sons qu'on auoit-euēs de le haster: mais en
demandāt aduis s'ils estoient vtils à faire:
Les Parlemens n'eussent esté empeschez
en la libre fonction de leurs charges. Les
Gouuerneurs des Prouinces & places im-
portantes n'eussent esté données aux per-
sonnes indignes & incapables. On eust ras-
ché à réunir les Ecclesiastiques & la Sor-
bonne, non à les diuiser & opprimer par
vaines disputes inutiles en ce temps. L'au-
torité des Prelats & Ecclesiastiques n'eust
esté violée, ains maintenue en son entier.
On n'eust donné aucune charge ny par fa-
ueur, ny par argent, l'aduis en eust esté de-
mandé aux Princes & Officiers de la Cou-
ronne, pour par vostre Majesté estre après

conferé à gēs capables. Les Ambassadeurs
n'eussent esté choisis que par le meisme ad-
uis, leurs inclinations n'eussent esté inco-
gneuës à tous ceux qui ont interest au biē
de l'Estat : Nulle despelche n'eust esté re-
ceuë, sans estre veuë & leuë en presēce des
dessusdits; On n'eust point souffert les en-
tretreprises faites sur la Nauarre, & le Môt-
ferrat, ny empesché le renouuellemēt de la
Ligue entre les Venissiens, & les Grisons
tant approuuée & desirée par le feu Roy,
auec Monsieur de Sauoye, sans meure de-
liberation; & pour vne entiere obseruation
des Edits de ceux de la Religion pretēdūē
refformée on leur eust osté tout subiect de
plainte; On eust reprimé ceux d'entr'eux,
qui eussēt passé les limites de leur deuoir,
on n'eust semé entr'eux des diuisions, qui
leur faisāt lōger à leur particulier, ont failly
aietter le public & l'estat en peril, on n'eust
donné trois cens mil liures pour l'achapt
d'Amboise, payant de l'argent du Rōy les
places de sa Majesté, on eust retranché tant
de dons immenses à personnes indignes, le
peu de persōnes ne se fust attribué les prin-
cipalles dignitez de l'Estat, sās l'aduis d'au-
cun Prince, ny des Officiers susdicts: Les

Estats ou le Cōseil vous eussent releuez de
rât d'importunitez, se chargeant de l'enuie,
& vous de benediction.

Vostre Majesté considerera, s'il luy plaist, les de-
fordres susdicts ; & les suiuans, & par iceux iugera
la necessité d'assembler les Estats generaux leurs &
libres, le chastiment des meschans, & la recompēce
des bons (soustien des Monerchies bien ordonnées)
estant peruertis, donnent assez a cognoistre le dan-
ger de ce Royaume. Tous les offices de iudicature,
& des fināces sont mōtez à prix excessifs, il ne reste
plus de recōpence pour la vertu, Puisque la faueur,
l'alliance, la parenté & l'argent ont tout pouuoir, &
que les finances sont de telle façon profuses, que
les cent mil pistolles ne coustent rien, mesmes sont
employées en choses de ncant, à gens qui s'enrichis-
sent sās travail du sang du peuple, Les plaintes, cla-
meurs & larmes de trois Estats, couuēt en leur cœur
vn feu caché, l'Eglise n'a plus sa splendeur : nul Ec-
clesiastique n'est plus employé aux ambassades ; &
n'a plus son rang au Conseil, les beneficiers sōt sur-
chargez de vexations & charges iniustes, la No-
blesse est appauurie & ruinée par tailles & imposi-
tions du sel ; par commissions extraordinaires pour
auoir de l'argēt, toutes leurs denrées sont doanées,
tous leurs tiltres sont recherchez biē que perdus &
bruslez, la Noblesse soustient de la France, terreur
des estrangers, maistresse de la campagne & vain-
cresse des batailles, qui restablit les Sceptres, & re-
leue les Couronnes, est maintenant taillée, bannie

des offices de iudicature & finances, faute d'argent, leur vie & leurs biens en puiffance d'autrui priuée de la paye des hommes d'armes & archers anciennement entretenus, & maintenant esclaués de leurs creanciers, le peuple lamente les charges qu'on trouuera redoublées par vne quantité de commissions extraordinaires depuis la mort du feu Roy: Il faut que tout tōbe sur les pauvres, pour les gages de riches: Les Princes & Officiers de la Couronne, auxquels le feu Roy aoit toute fiance, ont esté éloignez, & mal-traitez. On me rend presque par les discours qui courēt, & tous les Princes & Officiers de la Couronne qui me font l'honneur de conuenir avec moy, en mesme aduis, cōme perturbateurs du repos public. On tient conseil d'arrester les Princes & Officiers de la Couronne, bien que sans crime, ce qui paroist auoir esté deliberé cōtre la personne de Monsieur de Bouillon, & le refus fait à Monsieur de Longueuille d'aller exercer sa charge en son gouvernement, monstre assez la continuation de leur violence; & ce qui a esté executé en la personne de Monsieur de Védosme, lequel sans cōsiderer ce qu'il est au Roy, l'amitié particuliere, que le feu Roy luy portoit, non accusé, exempt de tous crimes, sans aucune forme de Iustice, sans aduis d'aucun grand de ce Royaume, on a retenu prisonnier: Cela est inusité en France, singulieremēt, durant la minorité du Roy, ce que nous croyons n'auoir esté fait par aucun mauuais naturel de vostre Majesté, ny de sūr de faire iniustice: c'est pourquoy, nous suppliōs tres-humblement vouloir le faire deliurer, afin qu'en con-

tinuant

tinuant à bié seruir le Roy & l'Estat, il luy monstre par bons effects, cōme il a fait, iusques icy n'auoir eu iamais aucune mauuaise intention contre son seruice: On veut persuader à vostre Majesté de s'at-
mer, on prend pour pretexte nostre absence.

Considerez, Madame, que nous procedons par tres-humbles requestes, supplications & remonstrances, & non à main armée, & quelles maledictiōs la France donnera à ceux qui troublans le repos de cet Estat & tranquillité, acquise par la vertu du feu Roy, mettront les premiers les armes à la main: Toute la France ne respire que la paix, & vne paisible & iuste reformatiō de cet Estat, vous, sera-il donc dit (Madame) que les mauuais Conseils qu'on vous donne, vous portent à emprisonner les presens & à armer contre les absens, qui procurent vne saincte reformation, & sont si fidelles seruiteurs du Roy, de vous & de l'Estat, donnant par ce moyen vn si ample subject de gloire.

Considerez ma lettre (Madame) & vous n'y trouuerez rien de nos interests particuliers, ny à nos intentiōs presentes ny à l'aduenir: vous ne pouuez trouuer mauuais, si plusieurs vous supplient d'une mesme cho-

se, & tous le desirent: Obligez par leur deuoir, & par l'amitié qu'ils ont contractée par vostre commandement pour pouruoir à tous les accidens cy dessus representez.

Je supplie tres-humblement vostre Majesté, del' aduis de plusieurs Princes, Ducs, Pairs & Officiers de la Couronne, Cours Souueraines, Ecclesiastiques, & autres Seigneurs, tant presens qu'absens, qui ont veu & approuué la presente supplication, d'accorder l'assemblée des Estats generaux libres & seurs dans trois mois au plus tard: & cepédant retenir toutes les choses en estat pacifique, protestant de nostre part, que nous n'auons desir que pour la cōseruation de la paix & bien de cet Estat, & que nous n'attenterons au contraire, si par vne precipitée resolutiō de nos ennemis, qui se couurent du manteau de l'Estat sous vostre auctorité, nous ne sommes prouocquez à repousser leurs injures faites au Roy, & à l'Estat, par vne naturelle, iuste & necessaire deffence.

Supplications tres-humble que ie fais en qualité de premier Prince du sang, en l'Estat que ie suis, & sans armes, non ainsi que ceux qui pour proffiter de telles assemblées

faissoient des villes, armoient le peuple,
& des estrangers, & faisoient guerre & paix
à leur profit pour vne lieutenâce generale,
guuernemēt des Prouinces & des places,
puis aidoyent à eluder l'assemblée, sans se
sancier de la reformation publique.

Nous supplions aussi tres-humblement
vostre Majesté suspēdre l'execution du ma-
riage tant du Roy, que de Mesdames ses
Sœurs, iusques à l'assemblée desdits Estats.
Et pour mōstrer que nostre particulier n'a
nul pouuoir sur nous : Nous remettons au
Roy en l'assemblée desdits Estats libres &
seurs si la necessité de ses affaires le requiert
toutes nos pēsions & gratifications contre
les calomnies de ceux qui nous accusent
qu'il n'y alloit q̄ de nostre particulier, que
nous preferons au public : Medisance de
ceux qu'on dit aymer mieux mettre le feu
au Royaume, que de voir leur autorité
pernicieuse qui sera renuersée par nostre
iuste & bon Roy. Auquel nous supplions
tres-humblement vostre Majesté, vouloir
faire donner bonne instruction, & de luy
oster les cōseils de toute partialitez qui luy
sont donnez contre ceux qui ont l'hōneur
d'estre ses plus proches sujets & seruiteurs,

& pour son contentement r'appellent le Cheualier de Vaudosme tenir près de sa Majesté pour le soin de sa santé persōne vie de religion & probité requise & cogneuë.

Nous supplions aussi vostre Majesté vouloir pouruoir aux Gouverneurs des frontieres de deniers suffisans pour vacquer à la cōseruation des places qu'ils ont en garde. Nous recognoissons nostre Roy no^r estre donné de Dieu nous sçauons l'obeissance que nous luy deuons, & n'y manquerons d'vn seul point: Nous esperon faussi que to^s les Princes & Officiers de la Couronne, Cours souueraines Ecclesiastiques & Seigneurs qui sont prests de vostre Majesté, se ioindront à nostre mesme desir, & auront tous ensemble préparé à vostre Majesté, le chemin. l'hōneur & la gloire, d'auoir restably tous les ordres de ce Royaume en leur premiere splendeur & liberté, reformé ce Royaume & r'asseure leur repos avec autāt de los que si vous en auiez acquis vn autre: Respondans genereusement à ceux qui disent les Estats diminuer l'autorité du Roy; que vous l'aurez r'affermi & rendu perdurable: Nous vous voulons seruir & assister ausdits Estats ainsi qu'il sera recogneu vtile

au seruice du Roy, à la France, & à la con-
seruation de l'authorité Royale, & de celle
de vostre Majesté estans ses tres-humbles
seruiteurs, & en particulier ie la supplie tres-
humblement de croire que ie suis,
MADAME,

Vostre tres-humble & tres-obeyssant
seruiteur & subiet HENRY
DE BOURBON.

De Mesieurs le 18.

Februarier, 1614.

*Lettre de Monsieur le Prince, au Parlement de Paris, pre-
sentée par le sieur de Fiesbrum, le 12. Februarier 1614.*

Messieurs, ie sçay que l'on prendra mes iu-
stes intentions de beaucoup de calomnies &
faux bruits tous cōtraires (ie m'asseure) à l'opinion
que vous en prendrez, comme m'ayant aussi practi-
qué & recogneu, que craignant d'alterer quelque
chose par mes resolutions que i'ay eües au seruice
du Roy & bien de l'Estat, i'ay retenu mes iustes res-
sentimés, & les ay comme enseuelis par ma patien-
ce; Mais encores vous en veux-ie mieux esclarcir,
& rendre comme compte de mes actions, à vous dy
je, que ie recongnois estre la principale tutrice de
cest Estat. C'est pourquoy ie vous enuoye la coppie
des lettres que i'escris à la Royne, par ou i'expose
entierement les saintes affections qui m'ont meu à
me retirer de la Cour pour ne cōmuniquer ny ad-

herer aux abus qui s'y commettent par ceux qui manient & disposent des affaires du Roy & de l'Estat, en demandant la reformation avec tres-juste supplication à la Royne, luy en proposant le remede & requerant comme premier Prince du sang sujet du Roy, & qui a le principal interest au bien du service de sa Majesté. N'ayant pour toutes armes que mes tres-humbles prieres à sa Majesté, comme vous le verrez par la coppie que ie vous enuoye vous suppliant humblement, Messieurs de nous assister de vos conseils & autoritez en vne si loüable & raisonnable entreprise, comme les plus considerables au service du Roy & reformation de l'Estat, Ce faisant vous vous acquitterez du deu de vos charges & acquerrez gloire & reputation, demeurant

MESSIEURS,

Vostre tres-humble & tres-
affectionné seruiteur.

*Lettre de Monsieur le Prince, à
Mr. le Prince de Conty.*

MONSIEVR, Je ne scaurois assez regretter, que vostre santé soit vn iuste empeschement à ne vous voir selon vostre courage affectonné au service du Roy, par vostre Prince, à ce qui est de nos Sinceres Intentiōs, dont par l'enuoy de ce Gentil-homme & coppie de la lettre que i'escris à la Roynne. Vous cognoistrez la verité. Je vous supplie donc (comme étant du sang Royal) comme proche du Roy, interessé à l'Estat, & mon seul oncle seconder, ou vostre indisposition vous retient, nos iustes desseins, tendant sans armes à la refformation de l'Estat. Surquoy l'on arme non pour sauuer l'Estat: Mais pour conseruer l'ambitiō de ceux qui sont cause de ses desordres. Aydez aussi ie vous supplie par vostre courageuse intercession, à la deliurance de Monsieur de Vendosme, & à la correctiō des desordres, par vne assemblée d'Estat, Que ie requiers à sa Majesté. A quoy ie vous supplie vous ioindre, Vous suppliant me tenir à iamais

Monsieur,

Vostre bien-humble Nepueu & seruiteur
HENRY DE BOVRBON.

De Mezières, ce Feburier 1614.

Lettre de Monsieur de Nevers à la Royne.

MADAME,
I'ay desia donné aduis à vostre Majesté de la
rebellion qui auoit esté faite contre l'authorité
du Roy, par ceux de la Citadelle de ceste ville.
Maintenant ie luy donne celuy de l'obeissance que
ie luy ay faict rendre estans sortis & me l'ayant re-
mise entre les mains : A la seureté de laquelle i'ay
pourueu, pour y estre vostre Majesté obey, ainsi
qu'elle le peut esperer de moy, estimant qu'elle
mettra en consideration la desobeissance qui m'a
esté rendue par le Marquis de la Vieuille, en la char-
ge qu'il a pleu au Roy me dōner en ceste Prouince.
Cest exemple pouuant tirer vne consequence com-
mune, & générale à tous les Gouverneurs de ce
Royaume. Ie supplie tres-humblement vostre
Majesté, Madame, en vouloir commander la Ju-
stice telle que vous l'estimerez nécessaire pour gar-
der l'authorité du Roy, & en laquelle ie puisse trou-
uer le contentement que vostre Maieité mesme iu-
gera raisonnable, veu que ceste ville est sous ma
charge, & à moy qui rend mon ressentiment d'au-
tant plus considerable : A quoy ie supplie vostre
Majesté d'auoir esgard, & de croire que ie suis,

Vostre tres-humble & tres-obeyssant seruiteur
& subject, NEVERS.

De Mezieres, ce 19. Feurier 1614.

